

Broj: 03-40-540/2022
Sarajevo, 27.04.2022. godine

**PARLAMENT FEDERACIJE
BOSNE I HERCEGOVINE**

Bosna i Hercegovina
Federacija Bosne i Hercegovine
**PARLAMENT FEDERACIJE
SARAJEVO**

Primljeno:		27-04-2022	
Org. jed.	Broj	Priloga	Vrijednost
01	-02-	874	122

- Predstavnički dom-
gosp. Mirsad Zaimović, predsjedavajući

Poštovani,

U prilogu Vam, u skladu sa Zahtjevom predsjedavajućeg Predstavničkog doma Parlamenta Federacije BiH, broj: 01-02-874/22 od 25.04.2022. godine, dostavljam Informaciju o zemljotresima na području Federacije Bosne i Hercegovine u periodu od 22. do 24. aprila 2022. godine, koju je Vlada Federacije Bosne i Hercegovine primila na znanje na 254. hitnoj sjednici, održanoj 27.04.2022. godine

S poštovanjem

PREMIJER
Fadil Novalić

Prilog: kao u tekstu

BOSNA I HERCEGOVINA
FEDERACIJA BOSNE I HERCEGOVINE
FEDERALNA UPRAVA CIVILNE ZAŠTITE

БОСНА И ХЕРЦЕГОВИНА
ФЕДЕРАЦИЈА БОСНЕ И ХЕРЦЕГОВИНЕ
ФЕДЕРАЛНА УПРАВА ЦИВИЛНЕ ЗАШТИТЕ

BOSNIA AND HERZEGOVINA
FEDERATION OF BOSNIA AND HERZEGOVINA
FEDERAL ADMINISTRATION OF CIVIL PROTECTION

INFORMACIJA
FEDERALNE UPRAVE CIVILNE ZAŠTITE O ZEMLJOTRESIMA NA
PODRUČJU FEDERACIJE BOSNE I HERCEGOVINE U PERIODU OD 22. DO
24. APRILA 2022. GODINE.

Sarajevo, 26. april 2022. godine

adresa: Vitomira Lukića 10, 71000 Sarajevo
tel: +387 33 779 450, fax: +387 33 779 499
web: www.fucz.gov.ba
e-mail: info@fucz.gov.ba

I - UVODNE NAPOMENE

Dana 22.04.2022. godine u 23:07 sati, snažan zemljotres pogodio je područje Hercegovine. Prvi podaci Euromediteranskog seizmološkog centra (EMSC) pokazali su da je magnituda bila 5,7 po Richteru, a epicentar zemljotresa bio je 19 kilometara od grada Stoca i oko 40 kilometara od grada Mostara, odnosno u općini Berkovići, u mjestu Strupići. Podrhtavanje tla se, prema podacima EMSC, osjetilo u cijeloj Bosni i Hercegovini, kao i u susjednim zemljama u regionu.

Tom prilikom jedna osoba je smrtno stradala, a nekoliko osoba je zadobilo lakše povrede. Radi se o porodici na čiju su se porodičnu kuću, usljed zemljotresa sručile stijene, odnosno gromade kamenja, usljed čega su stradali članovi te porodice.

Zemljotres je prouzrokovao materijalnu štetu na objektima starije gradnje i na ruševnim objektima, kako u gradu Stolac, Čapljina kao i u Mostaru, te u općinama Ljubinje i Berkovići (RS), a izazvani su i brojni odroni na putnim pravcima Stolac-Mostar, Stolac-Neum, Stolac-Ljubinje i Stolac-Berkovići.

Tokom noći radnici preduzeća Komunalno d.o.o. Stolac i Dobrovoljno vatrogasno društvo Stolac raščišćavali su saobraćajnice po gradu uslijed pada žbuke i kamenja sa ruševnih zgrada.

Osim toga, u periodu od 22. do 24. aprila, aparati u Centru za seizmologiju, Federalnog hidrometeorološkog zavoda u Sarajevu, registrovali su niz jačih zemljotresa na području Hercegovine. Epicentri potresa su bili u okolini Stoca. Magnituda potresa u hipocentru je iznosila između 3,0 Richtera i 5.6 Richtera, dok je intenzitet u epicentru bio između IV i VIII stepeni Merkalijeve skale.

Usporedbe radi razorni potres kod Petrinje koji se desio 29. decembra 2020. godine bio je 6,4 stepeni Richterove magnitude, a osim u cijeloj Hrvatskoj osjetio se i u dijelovima Austrije, Bosne i Hercegovine, Crne Gore, Češke, Italije i drugih zemalja.

Uposlenici preduzeća Ceste Mostar su na terenu putnog pravca Stolac-Neum gdje je došlo do odrona.

Prijavljeno je oko 90 prijava građana o nastalim oštećenjima stambenih objekata, odnosno stanova i porodičnih kuća. Radi se o napuknuću zidova, probijanju kamenih gromada na zidovima kuća, oštećenju dimnjaka i polomljenim crijevovima.

Dana, 25.04.2022. godine stupila je na snagu Odluka o proglašenju stanja prirodne nepogode na području grada Stoca nastalu usljed potresa i aktivirana Komisija za procjenu šteta.

II - PREDUZETE PREVENTIVNE MJERE I AKTIVNOSTI FEDERALNE UPRAVE CIVILNE ZAŠTITE

U skladu sa propisanim nadležnostima Federalna uprava civilne zaštite svim kantonalnim upravama civilne zaštite i općinskim/gradskim službama civilne zaštite uputila je Preporuke za preduzimanje preventivnih mjera zaštite i spašavanja od prirodnih i drugih nesreća na području Federacije BiH (akt broj: 05-40-9-112-3/2021 od 08.03.2022. godine), s ciljem da navedeni organi u skladu sa svojim ovlaštenjima na području općine/grada i kantona preduzmu sve potrebne mjere i radnje u cilju sprečavanja nastajanja prirodnih i drugih nesreća i opasnosti po ljude i materijalna dobra.

Rukovodilac Federalne uprave civilne zaštite Enes Memić je sa saradnicima u subotu, nakon zemljotresa koji je u petak 22. aprila, pogodio Bosnu i Hercegovinu, obišao najpogođeniji grad Stolac, gdje se sastao i sa gradonačelnikom Stjepanom Boškovićem. Na sastanku je gradonačelnik Bošković upoznao Memića sa stanjem i

poduzetim aktivnostima na području grada nakon zemljotresa a Federalna uprava civilne zaštite ponudila je pomoć i stavila na raspolaganje sve potrebne kapacitete, kako Stocu, tako i ostalim mjestima pogođenim zemljotresom.

Konstatovano je da trenutno nema potrebe za angažmanom resursa Federalne uprave civilne zaštite jer lokalne zajednice u ovom trenutku mogu odgovoriti sa postojećim resursima ali se prati situacija na terenu, posebno zbog mogućnosti pojave klizišta pa ako se ukaže potreba tražit će se pomoć viših nivoa vlasti.

Predstavnici Federalne uprave civilne zaštite obišli su područje i kuću u kojoj je u zemljotresu tragično stradala djevojka Elmira Sefo, posjetili njenu porodicu, izrazili im saučešće a povrijeđenim zaželi brz oporavak.

Rukovodilac FUCZ sastao se i sa predstavnicima Inženjerske komore Federacije BiH koji su došli u Stolac da ponude stručnu pomoć u procjeni stepena oštećenosti objekata nakon zemljotresa koji je pogodio šire područje Stoca.

Federalna uprava civilne zaštite putem Federalnog operativnog centra 24 sata u kontaktu je sa svim institucijama, prati se stanje na terenu i u slučaju potrebe svi potrebni kapaciteti mogu biti na raspolaganju u veoma kratkom roku. Zemljotres jačine 5,6 stepeni Richterove skale (prema fhmzbih.gov.ba) sa epicentrom u okolini Stoca peti je najjači zemljotres ikada izmjeren na tlu Bosne i Hercegovine i najjači u posljednjih 50 godina.

Nekoliko osoba je povrijeđeno u Stocu, a u gradovima Hercegovine zabilježena je materijalna šteta na mnogim objektima.

Imajući u vidu naprijed navedeno, gradonačelnik Stoca je poslao molbu za stručnu pomoć za stabilizaciju stijena i kosina iznad stambenih kuća iz razloga što je na više stambenih objekata evidentirana šteta nastala uslijed destabilizacije i pucanja stjenjskih masiva i obaranja stijena sa okolnih brda. Rizično područje se proteže na cca 2 km i gusto je naseljeno i potrebna je hitna sanacija. Federalna uprava civilne zaštite je odmah nakon prijema zahtjeva Grada Stoca uputila zahtjev Federalnom zavodu za geologiju kako bi njihov stručni tim izašao na teren, sagledao stanje i predložio odgovarajuće mjere za sanaciju ugroženog područja.

III - PREGLED SLIJEDA DOGAĐAJA NAKON ZEMLJOTRESA NA PODRUČJU FEDERACIJE BOSNE I HERCEGOVINE OD 22. DO 24.04.2022. GODINE

a) HERCEGOVAČKO-NERETVANSKI KANTON

U periodu od 22. do 24.04.2022. godine, aparati u Centru za seizmologiju, Federalnog hidrometeorološkog zavoda u Sarajevu, registrovali su niz jačih zemljotresa na području Hercegovine. Epicentri potresa su bili u okolini Stoca. Magnituda potresa u hipocentru je iznosila između 3,0 Richtera i 5.6 Richtera, dok je intenzitet u epicentru je bio između IV i VIII stepeni Merkalijeve skale. Prema izvještaju Federalnog operativnog centra za dane 24/25.04.2022. godine u posljednjih 12 sati na području Stoca nije bilo zemljotresa.

Euromediteranski seizmološki centar (u daljem tekstu: EMSC) je precizirao u svom izvještaju da je epicentar potresa bio 19 kilometara istočno od Stoca u istočnom dijelu Hercegovine.

Podrhtavanje tla se, prema podacima EMSC, osjetilo i u Albaniji, Sjevernoj Makedoniji, Kosovu, Italiji i Sloveniji.

Usporedbe radi razorni potres kod Petrinje koji se desio 29. decembra 2020. godine bio je 6,4 stepeni Richterove magnitude, a osim u cijeloj Hrvatskoj osjetio se i u dijelovima Austrije, Bosne i Hercegovine, Crne Gore, Češke, Italije i drugih zemalja.

Kantonalni operativni centar civilne zaštite Hercegovačko-neretvanskog kantona (u daljem tekstu: KOC CZ HNK) je u svom redovnom izvještaju i dopunom redovnog izvještaja za 22., 23. i 24. 04.2022. godine izvijestio o slijedećem:

Grad Stolac

22. - 24.04.2022. godine na području grada zabilježio je niz zemljotresa jačine od 2.7 do 5.6 stepeni po Richteru. Tokom toga je:

- Dana 23.04.2022. godine prilikom snažnog zemljotresa jačine 5.6 stepeni po Richteru jedna osoba je smrtno stradala, a nekoliko je zadobilo lakše povrede.
- Nastala je materijalna šteta na ruševnim objektima i odroni na putnim pravcima Stolac – Mostar, Stolac – Neum, Stolac – Ljubinje i Stolac – Berkovići.
- Uposlenici Komunalno d.o.o. Stolac i Dobrovoljnog vatrogasnog društva Stolac su na terenu i raščišćavaju građevinski materijal sa gradskih saobraćajnica, stambenih zgrada i dimnjake.
- Uposlenici preduzeća Ceste Mostar su na terenu putnog pravca Stolac-Neum gdje je došlo do odrona.
- Zaprimljena je 90 prijava oštećenja stambenih objekata – na stanovima i porodičnim kućama. Radi se o napuknuću zidova, probijanju kamenih gromada na zidovima kuća, oštećenju dimnjaka i polomljenim crjepovima.
- U Domovima zdravlja Stolac nije bilo više prijava povrijeđenih osoba.

Grad Mostar

22. - 24.04.2022. godine na području grada osjetio se niz podrhtavanja tla usljed zemljotresa čiji je epicentar udaljen 40-ak kilometara od grada. Tokom toga je:

- U Titovoj ulici došlo do manjeg obrušavanja cigle i građevinskog materijala sa krova objekta na ulicu, što nije uzrokovalo nikakve posljedice. Pripadnici Profesionalne vatrogasne jedinice Grada Mostar su nakon brze intervencije omogućili nesmetano odvijanje saobraćaja.
- Na gradskoj magistrali u Donjoj mahali pojavio se manji odron kamenja s brda Hum koji su Profesionalne vatrogasne jedinice Grada Mostar uklonile i osigurale nesmetano odvijanje saobraćaja.
- Zaprimljene su dvije prijave oštećenja materijalnih dobara.

Grad Čapljina

22. - 24.04.2022. godine na području grada osjetio se niz podrhtavanja tla usljed zemljotresa čiji je epicentar u blizini grada. Tokom toga je:

- nastala materijalna šteta na zgradama i porodičnim objektima, kao i na više parkiranih vozila zbog pada crijepa na iste.
- Medicinsku pomoć u Domu zdravlja Čapljina zatražile su četiri osobe sa lakšim povredama.
- Rade se sanacije krova na Osnovnoj školi i tri stambene zgrade.
- Zaprimljene su prijave za pedesetak objekata za nužnu sanaciju krova, kao i za štete u stanovima i nosivim zidovima pojedinih zgrada.
- Završeno je sanacija dimnjaka i popravak krovova na 7 stambenih zgrada i 54 porodične kuće.
- Angažirani su svi raspoloživi pripadnici Profesionalne vatrogasne jedinice i ispomoć korpe iz Javne vatrogasne postrojbe Metković.

b) ZAPADNOHERCEGOVAČKI KANTON

Zemljotresi od 22. do 24.04.2022. godine osjetili se i na području Zapadnohercegovačkog kantona. Osim uznemirenosti stanovništva nije bilo drugih posljedica.

c) KANTON 10

Na području Kantona 10, a prema podacima iz MUP Kantona 10 nije bilo dojava o materijalnoj šteti nakon potresa od 22.04.2022. godine.

d) ZENIČKO-DOBOJSKI KANTON

Zemljotres od 22.04.2022. godine, registrovan u 23:07 sati, osjetio se i na području Zeničko-dobojskog kantona, te je izazvao uznemirenost građana, pogotovo u zgradama i soliterima na višim spratovima.

Nema prijava o povrijeđenim licima kao ni prijava o eventualnoj materijalnoj šteti zaključno sa 23.04.2022. godine.

e) BOSANSKO-PODRINJSKI KANTON

Zemljotres od dana 22.04.2022.godine osjetio se i na području BPK Goražde osjetio se zemljotres. Takođe je i drugi zemljotres jačine 3,7 po Richteru zabilježen je oko 00:25 sati (23.04.2022. godine). Na području BPK Goražde navedeni zemljotres nije prouzrokovao materijalnu štetu. Drugih pojava opasnosti koje ugrožavaju ljude i materijalna dobra nije bilo .

f) UNSKO-SANSKI KANTON

Zemljotres registrovan dana 22.04.2022.godine osjetio se i na području Unasko-sanskog kantona. Prema podacima kojima raspolažemo KOC CZ USK nije bilo povrijeđenih, niti je isti prouzrokovao štetu.

III - PREGLED ISKAZANIH ŠTETA SA 24.04.2022. GODINE

Ministarstvo sigurnosti Bosne i Hercegovine, odnosno Operativno-komunikacijski centar 112 (u daljem tekstu: OKC BiH 112) je e-mailom od 23.04.2022. godine zatražilo dostavu informacija vezanih za prve procjene šteta na područjima pogođenim zemljotresom, kako od Operativnog centra Federalne uprave civilne zaštite, tako i direktno od KOC CZ HNK i općina na području Hercegovačko-neretvanskog kantona.

Obzirom da je OKC BiH 112 tokom 23.04.2022. godine zaprimio više upita od strane različitih međunarodnih organizacija i institucija o trenutnom stanju u područjima pogođenim zemljotresom i eventualnim potrebama, KOC CZ HNK je vrlo brzo istog dana dostavili infomacije iz Grada Stoca, Mostara i Čapljine koje su proslijeđene Ministarstvu sigurnosti Bosne i Hercegovine.

Na osnovu izvještaja, koji su pristigli nakon 24.04.2022. godine, iz gradskih/općinskih službi i kantonalnih uprava civilne zaštite, nakon prijava štete od strane privatnih i pravnih lica, evidentirane su štete na materijalnim dobrima kako slijedi:

Grad Stolac

Uslijed zemljotresa na području Grada evidentirane su materijalne štete na javnim, privrednim, kulturnim, vjerskim, stambenim i drugim objektima. 235 osoba je prijavilo

materijalnu štetu na stambenim objektima-stanovima i porodičnim kućama. Nadležne službe Grada Stoca su nastavili sa daljnjim aktivnostima uklanjanja porušenih dimnjaka, crijepa i čišćenje gradskih ulica.

Grad Čapljina

Uslijed potresa na teritoriju Grada nastupila je velika materijalna šteta na zgradama i porodičnim objektima. Do sada je završena sanacija dimnjaka i popravak krovšta na 16 stambenih zgrada, dva školska objekta, jedan vjerski objekat i 81 porodična kuća.

Grad Mostar

Prema informacijama nadležnih službi na području Grada Mostara nije bilo značajnijih prijava od strane građana ili pravnih lica o nastalim štetama ili posljedicama zemljotresa.

Općina Neum

Prijavljena su tri oštećenja na privatnim stambenim objektima, nastala u proteklom potresima.

Nakon što su se stekli uslovi općinske/gradske komisije za procjenu štete su izašle na teren u cilju procjenjivanja nastalih šteta na materijalnim dobrima u skladu sa svojim ovlaštenjima utvrđenim Uredbom o jedinstvenoj metodologiji za procjenu šteta od prirodnih i drugih nesreća („Službene novine Federacije BiH“, br. 75/04 i 38/06, 52/09, 56/09 i 36/14).

Shodno svemu prethodno navedenom predlažemo Vladi Federacije Bosne i Hercegovine da na narednoj sjednici razmotri ovu Informaciju i donese slijedeće zaključke

BOSNIA AND HERZEGOVINA
FEDERATION OF BOSNIA AND HERZEGOVINA
GOVERNMENT

Na osnovu člana 19. stav (4) Zakona o Vladi Federacije Bosne i Hercegovine ("Službene novine Federacije BiH" br. 1/94, 8/95, 58/02, 19/03, 2/06 i 8/06), Vlada Federacije Bosne i Hercegovine na 254. hitnoj sjednici, održanoj 27.04.2022. godine, donosi

ZAKLJUČAK

1. Prima se na znanje Informacija Federalne uprave civilne zaštite o zemljotresima na području Federacije Bosne i Hercegovine u periodu od 22. do 24. aprila 2022. godine.
2. Zadužuju se Federalni štab civilne zaštite i Federalna uprava civilne zaštite da permanentno prate i analiziraju stanje sa zemljotresima širom Federacije Bosne i Hercegovine, posebno na području Hercegovačko-neretvanskog kantona, te da izvještavaju Vladu Federacije Bosne i Hercegovine, i da po potrebi u okviru svoje nadležnosti, angažiraju federalne specijalizirane jedinice civilne zaštite i federalne službe zaštite i spašavanja radi provođenja mjera zaštite i spašavanja.
3. Daje se preporuka općinama/gradovima na području Federacije Bosne i Hercegovine, a posebno na području Hercegovačko-neretvanskog kantona da formiraju veći broj komisija za procjenu šteta u cilju utvrđivanja procjene šteta u što kraćem roku.
4. Zadužuje se Federalni zavod za geologiju da hitno aktivira svoje stručne timove u cilju procjene trenutnog stanja i davanja prijedloga mjera za ublažavanje negativnih posljedica izazvanih prirodnom nesrećom.
5. Ovaj zaključak stupa na snagu danom donošenja.

V. broj: 594 /2022
27.04.2022. godine
Sarajevo



PREMIJER
[Signature]
Fadil Novalić

BOSNIA AND HERZEGOVINA
FEDERATION OF BOSNIA AND HERZEGOVINA
GOVERNMENT

Na temelju članka 19. stavak (4) Zakona o Vladi Federacije Bosne i Hercegovine ("Službene novine Federacije BiH" br. 1/94, 8/95, 58/02, 19/03, 2/06 i 8/06), Vlada Federacije Bosne i Hercegovine na 254. hitnoj sjednici, održanoj 27.04.2022. godine, donosi

ZAKLJUČAK

1. Prima se k znanju Informacija Federalne uprave civilne zaštite o zemljotresima na području Federacije Bosne i Hercegovine u razdoblju od 22. do 24. trevnja 2022. godine.
2. Zadužuju se Federalni stožer civilne zaštite i Federalna uprava civilne zaštite da permanentno prate i analiziraju stanje sa zemljotresima širom Federacije Bosne i Hercegovine, posebno na području Hercegovačko-neretvanskog kantona, te da izvješćuju Vladu Federacije Bosne i Hercegovine, i da po potrebi u okviru svoje nadležnosti, angažiraju federalne specijalizirane jedinice civilne zaštite i federalne službe zaštite i spašavanja radi provedbe mjera zaštite i spašavanja.
3. Daje se preporuka općinama/gradovima na području Federacije Bosne i Hercegovine, a posebno na području Hercegovačko-neretvanskog kantona da formiraju veći broj povjerenstava za procjenu šteta u cilju utvrđivanja procjene šteta u što kraćem roku.
4. Zadužuje se Federalni zavod za geologiju da žurno aktivira svoje stručne timove u cilju procjene trenutnog stanja i davanja prijedloga mjera za ublažavanje negativnih posljedica izazvanih prirodnim nepogodom.
5. Ovaj zaključak stupa na snagu danom donošenja.

V. broj: 594 /2022
27.04.2022. godine
Sarajevo

**PREMIJER**

Fadil Novalić

BOSNIA AND HERZEGOVINA
FEDERATION OF BOSNIA AND HERZEGOVINA
GOVERNMENT

На основу члана 19. став (4) Закона о Влади Федерације Босне и Херцеговине ("Службене новине Федерације БиХ" бр. 1/94, 8/95, 58/02, 19/03, 2/06 и 8/06), Влада Федерације Босне и Херцеговине на 254. хитној сједници, одржаној 27.04.2022. године, доноси

ЗАКЉУЧАК

1. Прима се на знање Информација Федералне управе цивилне заштите о земљотресима на подручју Федерације Босне и Херцеговине у периоду од 22. до 24. априла 2022. године.
2. Задужују се Федерални штаб цивилне заштите и Федерална управа цивилне заштите да перманентно прате и анализирају стање са земљотресима широм Федерације Босне и Херцеговине, посебно на подручју Херцеговачко-неретванског кантона, те да извјештавају Владу Федерације Босне и Херцеговине, и да по потреби у оквиру своје надлежности, ангажују федералне специјализоване јединице цивилне заштите и федералне службе заштите и спасавања ради провођења мјера заштите и спасавања.
3. Даје се препорука општинама/градовима на подручју Федерације Босне и Херцеговине, а посебно на подручју Херцеговачко-неретванског кантона да формирају већи број комисија за процјену штета у циљу утврђивања процјене штета у што краћем року.
4. Задужује се Федерални завод за геологију да хитно активира своје стручне тимове у циљу процјене тренутног стања и давања приједлога мјера за ублажавање негативних посљедица изазваних природном несрећом.
5. Овај закључак ступа на снагу даном доношења.

В. број: 594/2022
27.04.2022. године
Сарајево

